

# Il CSEB es sün via da success

Diminui ils cuosts ed augmantà la qualità dals servezzans


**Avant quatter ons es gnü fundà il Center da sandà Engiadina Bassa. La stretta collavuraziun sül sector da sandà maina blers avantags ed ha eir ün'influenza positiva sül rendaint.**

NICOLO BASS

«L'on scuors es stat intensiv ed ha manà success», declera Philipp Gunzinger, president da la direcziun dal Center da sandà Engiadina Bassa (CSEB). Il CSEB exista daspö quatter ons ed unischa l'Ospidal Engiadina Bassa, il Bogn Engiadina, ils servezzans dal Spitex e da chüra in Engiadina Bassa suot ün têt. «La stretta collavuraziun s'ha verificada e la lavur po gnir fatta da möd efficaci», es Gunzinger persvas. Las structurazions d'organisaziun dals singuls affars sun gnüdas optimadas, uschè cha la collavuraziun funcziuna optimalmaing e las sfidas futuras pon gnir superadas. Tenor Gunzinger s'haja eir pudü s-chaffir novas spüertas chi cumpletan ils servezzans da fin qua in ün möd chi cuntainta a cliants, paziaints, abitants e giasts, «e natüralmaing eir al resultat economic da tuot l'organisaziun». Quist sistem da collavuraziun es per el eir innovativ e giouva üna rolla da pionier in tuot la Svizra.

## Schmezzà il deficit da l'Ospidal

Il deficit 2009 da l'Ospidal Engiadina Bassa ha pudü gnir quasi schmezzà in congrual cul rendaint 2008. Nempe da 526 000 francs sün 284 000 francs. Per Gunzinger es quai ün resultat fich allegraivel e cuntinuescha eir in congrual cul rendaint 2007 il svilup positiv. «Il deficit da quella jada da 725 000 francs vaina pudü sbassar per raduond 0,5 milliuns francs». Dürant ils ultims ons ha l'Ospidal Engiadina Bassa realisà grondas investiziuns ill'infrastructura. E culla collavuraziun i'l CSEB es tenor il president da la direcziun eir gnü optimà l'andamaint da lavur e dozzà la qualità dals servezzans da gestiun e medicinalis da l'ospidal. Il numer da paziaints staziunaris s'ha augmantà d'ürant ils ultims



L'Ospital Engiadina Bassa a Scuol ha pudü schmezzar il deficit causa la collavuraziun suot il tet dal Center da sandà Engiadina Bassa.

quatter ons per 20 pertschient e quel dals paziaints ambulants per passa 35 pertschient. «Ün cumpliment plü grond ed üna meglra declaranza da fiduzcha illa qualità dals servezzans medicinalis nun es bod na pussibel», es Gunzinger persvas.

Eir tuot la spüerta complementara e palliativa chi'd es integrada plainamaing illa spüerta da l'ospidal, s'ha in mincha cas verificada e maina a quist resultat da gestiun excellent.

## Creschü il numer da cliants

Eir l'affar da Spitex ha fabrichà oura permanentamaing la spüerta e la dumanda davo quists servezzans crescha cuntinuantamaing. E listess preschainta la Spitex ün resultat chi'd es per 18 pertschient (91 700 francs) meglider co l'on avant. «Vairamaing vess il deficit cun daplü spüertas e daplü dumandas davo servezzans da gnir plü grond. Ma cun optimar l'andamaint da lavur ed augmentar l'effizienz vaina listessamaing raggiunt ün meglider resultat», declera Gunzinger tuot cuntaint. Dürant ils ultims quatter ons es il numer da cliants creschü per passa 30 pertschient e la dumanda davo il servezzan da gianar s'ha redublada. Per Gunzinger demuossa quist svilup cha culla strategia «ambulant avant staziunari» s'esa sülle dretta via e cha quai as cunfà culs giavüschs da la populaziun indigena.

Dürant l'on 2009 sun gnüdas fattas grondas investiziuns per fabrichar oura la Dmura «Chüra Lischana» per augmentar la qualità da viver e

d'abitar per ils abitants. Cun quai s'haja eir pudü dozzar il numer d'occupaziun. Eir las gruppas da chüra Prasad-chèr a Scuol e Chalamandrin in Samignun sun tenor Gunzinger sün via da success e vegnan stimadas da la populaziun.

## Post da contact e cussagliaziun

Causa il svilup demografic da la populaziun piglia la dumanda davo servezzans da sandà tenor Gunzinger cuntinuantamaing pro. Perquai ha il CSEB l'on passà eir integrà ün post da contact e cussagliaziun chi s'ha intant etabli. Quista spüerta vaina fabrichada oura d'ürant il prossem temp cul böt da pudair organisar in avegnir eir activitats da prevenziun per optimar il fliamaint decentral.

Eir il Bogn Engiadina Scuol (BES) sta davant grondas sfidas per l'avegnir per as pudair defender cun success i'l marchà da wellness. «D'üna vart vulaina cuntinuar culla strategia da fabrichar plü attractiv las spüertas existentas e da tshella vart vegnan planisadas novas spüertas e prodots strategics. Per l'on 2009 preschainta il BES ün quint equilibrà. Las entradas e sortidas totalas importan raduond 5,9 milliuns francs, resguardond amortisaziuns da passa 438 000 francs. Gunzinger es persvas da pudair nüziar suot il têt dal CSEB sinergias chi diminuischan sur tuot ils differents affars ils cuosts da gestiun, adonta cha'l numer da plazzas da lavur es gnü augmantà e chi mainan üna meglra qualità ed üna prestaziun efficaciazia dals singuls servezzans.